

GIYA SA DISKUSYON SA PAGLUNSAD OG KONTRA-PYUDAL NGA KAMPANYANG MASA



Gimantala sa
Ang Paghimakas

Disyembre 2023

Mahimong ma-download sa www.negrosrevportal.wordpress.com

KAUNDAN

Unsa ang pyudalismo? **7**

Unsa ang mga dagway sa pyudal ug alang-alang pyudal nga pagpanghimulos? **7**

Nganong kinahanglang tapuson ang pyudalismo? **8**

Unsa ang kontra-pyudal nga kampanyang masa? **9**

Kinsa ang palihukon sa kontra-pyudal nga kampanyang masa? **10**

Asa ilunsad ang mga kontra-pyudal nga kampanyang masa? **11**

Unsaon pagpalihok ang masa sa kontra-pyudal nga pakigbisog? **11**

Unsa ang mga mamahimong porma sa kontra-pyudal nga pakigbisog? **12**

Nganong kinahanglang isumpay ang kontra-pyudal nga kampanyang masa sa kontra-pasista ug kontra-imperyalista nga pakigbisog? **13**

Mga Panawagan **15**

Nagpabiling dugukan sa ekonomiya sa Pilipinas ang agrikultura. Apan ilawom sa rehimeng Marcos Jr, walay programa para sa tinuod nga reporma sa yuta o unsaon palambuon ang agrikultura sa nasud. Sa baylo, mas giduso niini ang mga kontra-mag-uuma nga mga palisiya nga pabor sa iyang mga kakunsabo nga nagharing hut-ong sa mga agalong yutaan, burgesya komprador ug mga burukrata kapitalista. Nagpadayon nga pito sa kada 10 ka mga mag-uuma ang walay kaugalingong yuta nga gi-uma. Kuyanap ang monopolyo sa kayutaan, pyudal ug alang-alang pyudal nga pagpanghimulos sa mga mag-uuma ug kamangtas gamit ang reaksyonaryong pwersa sa estado ug mga pribadong armado o paramilitar aron ipabilin ang kontrol sa halapad nga kayutaan sa kamot sa pipila nga nagharing hut-ong.

Ang padayon nga paghari sa mga agalong yutaan klarong nagpakita sa kapakyasan sa programa sa reporma sa yuta sa reaksyonaryong gobyerno. Partikular sa Negros, sa 427,656 ektarya (has.) sa kayutaan nga dapat i-apod-apod, 302,377 has. lamang ang na-apod-apod sa mini nga reporma sa yuta nga nabinlan pa og 125,279 has. sa Land Acquisition and Distribution (LAD). Ma-ihap kini sa 21% nga nasudnong balanse sa LAD. Kini tungod dili pursigido ang reaksyonaryong gubyerno nga mayorya mga agalong yutaan ug dagkong burgesya nga hugot nga ipatuman ang iyahang programa. Ang mga Agrarian Reform Beneficiaries (ARBs) nga nakadawat na unta sa ilang Certificate of Land Ownership Award (CLOA), kadaghanan wala aktwal nga naplastar sa ilahang kayutaan, ilabina sa lapad nga kayutaan pareho sa yuta sa pamilya Cojuangco diri sa Negros.

Aduna sab mga kaso sa sayop nga mga Notice of Coverage (NOC), peke nga mga benepisyaryo ug *land use conversion* aron malikayan sa mga agalong yutaan ang pagpa-ilawom sa reporma sa yuta. Ingon man, nigamit usab sila og relatibong mas bag-o apan malupigon gihapon nga mga iskema sama sa *stock distribution option* (SDO), ariendo, *block farming*, *corporate scheme*, *agribusiness venture agreement* (AVA), ug uban pa.

Gipatuman karon sa Department of Agrarian Reform ang SPLIT (Support to Parcelization of Land for Individual Titling) program nga nagtutok sa indibidwal nga titulo sa mga benepisyaryo sa reporma sa yuta. Bag-o lang gipirmahan ni Marcos Jr ang Land Emancipation Law nga kuno mopapas sa utang nga amortisasyon sa yuta sa Land Bank sa mga ARBs. Apan, sa pagkatinuod, mga pamaagi lang kini para mas sayon ug paspas nga subling makuha sa dagkung agalong yutaan ang yuta sa mag-uuma. Ang Negrosanong mag-uuma ug mamumuo sa kaumahan labing nag-antus sa grabe nga kakabus tungod sa monopolyo sa kayutaan ug rekonsentrasyon niini.

Usa ka siglo sa pagpanglupig ang kinabuhi sa kada henerasyon sa mga mamumuo sa kaumahan: sama'g-ulipon nga pagtrabaho sulod sa pila ka bulan kabaylo ang pwerte ka ubos nga suholan, ug kagutom sa mga bulan nga walay trabaho o sa panahon sa tigkiriwi. Gawas sa produksyon sa tubo, wala o kulang ang matikad nga yuta sa mga mag-uuma ug mamumuo sa kaumahan para tamnan og humay, mais, saging, lubi ug uban pa. Nakasinati sab sila og lain-laing klase sa pyudal ug alang-alang pyudal nga pagpanghimulos.

Sa pagka-itoy ni Marcos Jr sa imperyalismo, nagdugang pa ang mga kontra-katawhan ug kontra-mag-uuma nga neoliberal nga palisiya nga gipatuman susama sa Rice Tarrification Law ug liberalisasyon sa produktong agrikultural sama sa ahos, bombay, kalamay, ug uban pa, nga mga komprador, asyendero, burukrata kapitalista, *hoarder* ug magpapatigayon lang ang nakapulos samtang nag-aginod sa grabe nga kagutom ug kapobre ang mga kabus nga sektor nga konsumidor: mga mag-uuma, mamumuo sa katubhan, mamumuo, mga prodyuser, kabus nga tagadakbayan, mga kababayen-an, kabatan-onan ug uban pa.

Mas nikuyanap usab ang kombersyon sa agrikultural nga kayutaan ngadto sa eko-turismo, *economic zones*, *solar farms* ug *real estate*, samtang ang mga pananom alang sa pagkaon sa katawhan gitamnan og *palm oil* ug

uban pang *cash crop*. Gipakusog karon ang National Greening Program nga gigamit para maangkon na sab sa dagkong komprador burgesya, agalong yutaan ug langyaw'ng kapitalista ang kabukiran, kalasangan ug yuta sa mga tumandok. Daghan na ang mingsulod sa isla sa Negros nga mga kompaniya sa dagku ug makadaot nga minahan.

Pipila kini sa mga kahimtang kung nganong kinahanglang maghiusa ug makigbisog ang masang mag-uuma ug mamumuo sa kaumahan aron iduso ang kontra-pyudal nga pakigbisog para maangkon ang katungod sa yuta ug mahimong lig-on, halapad ug maisa ang ang-ang sa demokratikong rebolusyon sa katawhan.

1. UNSA ANG PYUDALISMO?

Ang pyudalismo ang relasyon sa produksyon pinaagi sa yuta nga gitikad sa mag-uuma ug gipanagiya sa agalong yutaan. Hangtod karon, nagpabiling gimonopolyo sa mga dagkong agalong yutaan ang mayorya sa kayutaan sa Pilipinas, samtang ang mag-uuma nga maoy tig-ugmad wala o halos wala'y gipanagiya. Isip mayorya sa populasyon o 75% sa katawhang Pilipino, nahigot ang mag-uuma sa mga pyudal ug alang-alang pyudal nga pagpanghimulos sa mga agalong yutaan sa lain-laing mga pamaagi ug nagpabiling gigutom. Para malingkawas ang mag-uuma sa maong kahimtang, kinahanglan ang tinuod nga reporma sa yuta ug nasudnong industriyalisasyon nga hul-os lamang nga makab-ot pinaagi sa demokratikong rebolusyon sa katawhan.

2. UNSA ANG MGA DAGWAY SA PYUDAL UG ALANG-ALANG PYUDAL NGA PAGPANGHIMULOS?

Panghimulos pyudal kini kung ang kahago sa mag-uuma sa pagtikad sa yuta baylohan sa agalong yutaan nga walay amot sa pagtikad sa yuta og dili makatarunganon nga bahin sa produkto sama sa tunga, tersya, ug inupat nga bahinay.

Ang pagpanghimulos mahimong alang-alang pyudal kung ang kahago sa mag-uuma baylohan na og kwarta, sama sa ubos nga suhulan sa mga mamumuo sa katubhan sa mga asyenda. Ang alang-alang pyudal nga sistema giharian sa imperyalismong US pinaagi sa dominasyon sa lokal nga hut-ong sa dagkung komprador burgesya ug agalong yutaan.

Lakip usab sa pyudal ug alang-alang pyudal nga mga pagpanghimulos ang lain-laing dagway sa usura sa porma sa alili, lokap ug tersiyahan; neoliberal nga patakaran sama sa microfinance (lending) nga Dungganon, Lifebank, ASA, RAFI, Taytay ug uban pa; mahal nga abang sa mga kahimanan sa produksyon ug taas nga presyo sa abono, pestisidyo ug uban pa; ang pagpalit sa mga produkto sa mag-uuma sa barato nga presyo; pagpangilog og yuta gamit ang ariendo-palit ug ubang ligal ug iligal nga pagpangilog og yuta; ug kuyanap nga kontraktwalisasyon sa mga asyenda pinaagi sa paggamit sa mga kontraktor nga naghatag og intresipo ug ubos nga suhulan ug walay benepisyo nga namig-ot ug nanghimulos sa mga mag-uuma sa katubhan.

3. NGANONG KINAHANGLANG TAPUSON ANG PYUDALISMO?

Kinahanglang tapuson ang pyudalismo para maangkon sa mag-uuma ang dugay nang gipangandoy nga makatag-iya og kaugalingong yuta nga siya ang nag-ugmad pero gimonopolyo sa mga agalong yutaan. Pinaagi niini, malingkawas ang mag-uuma ug mawala ang pyudal ug alang-alang pyudal nga mga kadena sa mag-uuma ug molambo ang agrikultura sa nasud.

Tungod sa pag-abante sa kontra-pyudal nga pakigbisog, makita sa mag-uuma nga ang rebolusyon nga gipanguluhan sa Partido Komunista sa Pilipinas (PKP) mao ang nagduso sa iyang katungod ug boluntaryo siyang mosalmot sa Bagong Hukbong Bayan (BHB), mopasakop sa rebolusyonaryong organisasyong masa o motabang pinaagi sa ubang mga porma.

4. UNSA ANG KONTRA-PYUDAL NGA KAMPANYANG MASA?

Sa kasamtangang ang-ang sa demokratikong rebolusyon sa katawhan, gilunsad ang kontra-pyudal nga kampanyang masa aron isulong ang minimum ug maksimum nga porma sa tinuod nga reporma sa yuta batok sa pyudal ug alang-alang pyudal nga pagpanghimulos. Kabahin ang agraryong rebolusyon sa tulo ka integrado nga gimbuhaton sa BHB, lakip na ang pagtukod sa baseng masa ug paglunsad og armadong pakigbisog. Tahas usab kini sa tanang ginsakpan sa rebolusyonaryong kalihukang masa. Nangunang unod sa demokratikong rebolusyon sa katawhan ang hisgutanan sa yuta nga demokratikong kagustuhan sa masang mag-uuma.

Gipaila-ila sa mag-uuma ang dagyaw, alayon, ug kooperatiba para sa mas abante ug kolektibo nga produksyon.

Kabahin man kini sa prinsipyo nga batakang pwersa ang mag-uuma sa rebolusyon ug maoy tuboran sa rekrutment sa Partido ug BHB.

5. KINSA ANG PALIHUKON SA KONTRA-PYUDAL NGA KAMPANYANG MASA?

Ang pesante usa ka gamhanang pwersa ug alyado sa mamumuo pinaagi sa partido niya sa rebolusyonaryong pakigbisog. Ang kontra-pyudal nga linyang masa sa kabanikanhan mao ang: nangunang mosandig sa kabus nga mag-uuma, kabigon ang tunga-tungang mag-uuma ug nyutralisahon ang adunahang mag-uuma aron mahimulag ug mapukan ang mga despotiko ug reaksyonaryong pwersa sa estado. Makighiusa sa mga mamumuo sa katubhan sa mga asyenda. Tagaan og pagtagad ang mga mamumuo sa logging ug minahan ug mga indigenous peoples. Hisgutanan sa halapad nga kabaybayonan, pukawon ug palihukon ang kabus ug tunga-tungang mananagat.

Kinahanglan ang lig-on nga sumpay ug tinabangay sa mga rebolusyonaryong organisasyong masa ngadto sa BHB.

Kinahanglan usab maayo nga makombina ang ilegal ug tinago sa ligal ug dayag nga pakigbisog aron mas halapad nga han-ay sa masa ang makab-ot pinaagi sa pagpakusog sa nagkahiusang prente sa nagkadaiyang sektor sama sa simbahan, academe, abogado, ug uban pang mga indibidwal, organisasyon, ug ahensya.

6. ASA ILUNSAD ANG MGA KONTRA-PYUDAL NGA KAMPANYANG MASA?

Ilunsad ang mga kontra-pyudal nga kampanyang masa sa kaumahan, asyenda, basakan, *ancestral domain* sa mga tumandok, ug uban pa. Depende sa mga produkto-tubo, humay, lubi-ug kahimtang ang paglunsad sa mga kampanya ug demanda.

Tungod halos pareho ang kahimtang sa mga mag-uuma sa usa ka lugar, ilunsad nato ang mga kampanya sa lebel sa barangay, lungsod, syudad, distrito ug probinsya depende sa katakos sa mga organisasyong masa, dili iya-iya nga mga kampanya kundili tibuok ug nagsumpayanay nga dinaghan nga kampanya aron pakusgon ang atong panawagan.

7. UNSAON PAGPALIHOK ANG MASA SA KONTRAPYUDAL NGA PAKIGBISOG?

Kinahanglan ang kuyanap nga pagtuon, ilabina sa Mubong Kurso sa Katilingban ug Rebolusyong Pilipino (MKKRP), Araling Aktibista (ARAK), Rebolusyonaryong Giya sa Reporma sa Yuta (RGRY), mga Espesyal nga Kursong Masa ug literasiya ug numerasiya. Maglunsad og katilingbanong pakisusi ug pagtuki sa hut-ong (SICA) para dugang mapalawman ug masabtan ang partikular nga kahimtang sa masang mag-uuma sa usa ka lugar ug matibuok ang mga porma sa pagpanghimulos nga ilang nasinati ug angayang pakigbisogan.

Kinahanglan usab ang pagpasundayag kultural ug uban pang porma sa propaganda aron hinay-hinay nga mapundar ang rebolusyonaryong diwa sa mag-uuma ug mabuak ang mga pyudal nga panghunahuna. Kinahanglan makapatumaw og mga instruktur, ahitador, ispiker, propagandista ug mga grupong pangkultura gikan sa han-ay sa halapad nga masa.

Kinahanglan usab pakusgon ang mga produksyon ug kolektibo nga paglihok sama sa mga kolektibo nga proyekto, dagyaw, alayon, ug mga kooperatibang masa para makasuporta sa mga kontra-pyudal nga kampanya ug makatabang sa mga organisasyon.

8. UNSA ANG MGA MAMAHIMONG PORMA SA KONTRA-PYUDAL NGA PAKIGBISOG?

Pinaagi sa mga militante, koordinado, ug organisadong kampanyang masa, giduso sa lain-laing ang-ang sa kontra-pyudal nga pakigbisog sa konteksto sa agraryong rebolusyon ang tinuod nga reporma sa yuta nga base sa kongkreto nga kahimtang ug kaandamon sa masa.

Sa minimum, giduso nato ang pagpa-ubos sa abangan sa yuta, pagwala sa usura, pagpataas sa suholan sa mga mamumuo sa kaumahan ug pagpataas sa presyo sa produkto sa mag-uuma. Pinaagi sa mga dayalogo, petisyon, negosasyon, welga, ug bungkalan maduso sa mag-uuma ang ilang mga demanda.

Hisgutanang sa suhulan, atong dal-on ang kampanyang 50-50 (P50 nga dugang sa inadlaw nga

suhulan ug 50% nga dugang sa pakyaw nga trabaho] nga isumpay usab sa pagduso sa pagpatuman sa *regional minimum wage* ug ang kampanya sa P750 nga *national minimum wage*. Kinahanglan usab iduso ang paghatag sa mga agalong yutaan sa benepisyo susama sa SSS, PhilHealth, mga *leave* ug uban pang insentibo. Lakip nga kolektibong iduso ang Social Amelioration Program (SAP) sa Department of Labor and Employment ug benepisyo gikan sa Department of Agriculture, ug ang pagbuksas sa mga anomaliya ug korapsyon nga nahitabo kasumpay sa distribusyon sa pundo sa mga ahensya sa gobyerno.

Kung sa bahinay, iduso nato ang 50% nga pagpasaka. Kung tinunga, atong iduso nga himuong inupat, pabor sa mag-uuma.

Sa mga pautang, iduso nato ang 50% nga pagpanubo sa interes, hangtod nga hinay-hinay magkagamay kaysa sa interes sa bangko.

9. NGANONG KINAHANGLANG ISUMPAY ANG KONTRA-PYUDAL NGA KAMPANYANG MASA SA KONTRA-PASISTA UG KONTRA-IMPERYALISTA NGA PAKIGBISOG?

Dili basta-basta nga itugyan sa mga agalong yutaan ang ilang gimonopolyo nga kayutaan tungod anaa sila sa poder ug magamit nila ang ilang gahum ug mga kaalyado nga anaa sa gobyerno ug mga langyawng kapitalista aron pintas nga pugngan ang masang pakigbisog.

Ang kontra-pyudal nga kampanyang masa dili himulag sa kontra-pasista nga kampanya batok sa terorismo sa rehimeng US-Marcos II nga gipatuman sa mersenaryong AFP-PNP ug mga paramilitar nga grupo. Kinahanglan ipakita ang mga

brutal nga krimen sa estado ug batokan ang militarisasyon sa kabanikanhan.

Dili man kini bulag sa kontra-imperyalista nga kampanya batok sa langyaw nga pagpanghilabot ug pagpanghimulos sa atong ekonomiya, pulitika, kultura ug militar nga mao ang nangunang rason sa alang-alang kolonyal ug alang-alang pyudal nga pagpanghimulos sa nasud nga hinpit nga nakaapekto sa mga mag-uuma.

10. MGA PANAWAGAN:

Ipatuman ang tinuod nga reporma sa yuta ug nasudnong industriyalisasyon!

Bungkagon ang sistemang asyenda!

Pakusgon ang mga kooperatiba ug asosasyon sa mga mag-uuma!

Ihatag ang angayang benepisyo sa mamumuo sa kampo!

Pasakaon ang suhulan sa mamumuo sa katubhan!

Isulong ang bungkalan o kolektibo nga pagtikad sa yuta!

Palayason ang mga pasistang militar sa kabanikanhan!

Batukan ang mga neoliberal nga balaod ug palisiya!

Isulong ang demokratikong rebolusyon sa katawhan!



ANG *Paghimakas*